



SLUŽBENI GLASNIK OPĆINE ŽIVINICE

GODINA L

17. SEPTEMBAR 2014.GODINE

BROJ 12

Bosna i Hercegovina
Federacija Bosne i Hercegovine
Tuzlanski kanton
Općina Živinice
Općinski načelnik
Broj:01/2-05-89-1208/14
Živinice, 17.09.2014. godine

Na osnovu člana 15. Zakona o principima lokalne samouprave („Službene novine Federacije Bosne i Hercegovine“, br. 49/06), člana 38. Statuta općine Živinice („Službeni glasnik općine Živinice“, br. 4/12), a u vezi sa Zakonom o finansiranju pomoći za otklanjanje posljedica prirodne nesreće i obnovu područja zahvaćenih prirodnom nesrećom („Službene novine Federacije Bosne i Hercegovine“, br. 59/14) i Uredbom o kriterijumima za dodjelu sredstava za otklanjanje posljedica prirodne nesreće i obnovu područja zahvaćenih prirodnom nesrećom („Službene novine Federacije Bosne i Hercegovine“, br. 66/14), općinski Načelnik donosi

PRAVILNIK

o bližim kriterijumima, postupku i dokumentaciji neophodnoj za ostvarivanje prava za dodjelu novčanih sredstava i građevinskog materijala na ime pomoći vlasnicima uništenih ili oštećenih stambenih zgrada na području općine Živinice

Član 1.

Ovim Pravilnikom se utvrđuju bliži kriteriji, postupak i dokumentacija neophodna za ostvarivanje prava za dodjelu novčanih sredstava za pomoć nastradalima na području općine Živinice za uništene i oštećene stambene zgrade, kao i za pomoć u građevinskom materijalu osobama pogođenim prirodnom nesrećom, proglašenom Odlukom Vlade Federacije Bosne i Hercegovine o proglašenju stanja prirodne nesreće na području Federacije Bosne i Hercegovine, uzrokovane obilnim kišnim padavinama koje su prouzrokovale poplave na području Federacije Bosne i Hercegovine, („Službene novine Federacije BiH“, br. 37/14) i Odlukom općinskog Načelnika o proglašenju stanja prirodne nesreće br. 01/2-05-89-454/14 od 14.05.2014. godine (u daljem tekstu: prirodna nesreća).

Član 2.

Korisnici prava na novčanu pomoć za obnovu uništenih ili oštećenih objekata su vlasnici stambenih zgrada (pravni ili faktički), koji su u momentu proglašenja stanja prirodne nesreće, odnosno na dan 14.05.2014. godine imali imovinu na području općine Živinice i koji ispunjavaju uvjete iz člana 2. Uredbe o kriterijumima za dodjelu sredstava za otklanjanje posljedica prirodne nesreće i obnovu područja zahvaćenih prirodnom nesrećom (u daljem tekstu: Uredba).

Bez ispunjavanja kriterija iz predhodnog stava ovog člana, niko neće moći ostvariti pravo na novčanu pomoć predviđenu ovim Pravilnikom.

Pravo na pomoć u smislu stava 1. ovog člana može ostvariti samo jedna osoba iz pripadajućeg domaćinstva vlasnika uništene ili oštećene stambene zgrade.

Ako zgrada ima više suvlasnika i više domaćinstava, pravo na pomoć po odredbama ovog Pravilnika može ostvariti samo jedan od suvlasnika uništene ili oštećene stambene zgrade.

Član 3.

Svi korisnici novčane pomoći u skladu sa odredbama ovog Pravilnika moraju ispunjavati kriterije iz člana 2. Uredbe, odnosno da su na dan proglašenja stanja prirodne nesreće:

-imali državljanstvo BIH i imovinu na području općine Živinice (pravni ili faktički vlasnik i članovi njegovog porodičnog domaćinstva);

-da je u vrijeme prirodne nesreće bio pravni ili faktički vlasnik stambene zgrade zahvaćene prirodnom nesrećom;

-da mu je odlukom nadležne općinske komisije utvrđen nastanak štete na stambenoj zgradi usljed prirodne nesreće od 14.05.2014. godine.

Član 4.

Pored uslova iz predhodnog člana ovog Pravilnika, korisnik prava na ostvarivanje novčane pomoći iz ovog Pravilnika bodovat će se po sljedećim kriterijima:

1. posjedovanje urbanističke saglasnosti, građevinske i upotrebne dozvole:

-posjedovanje naknadne urbanističke saglasnosti u postupku legalizacije bespravno izgrađenih objekata _____ 10 bodova

-posjedovanje građevinske dozvole _____ 15 bodova

-posjedovanje građevinske i upotrebne dozvole _____ 20 bodova

2. stepen oštećenja stambene zgrade:

-potpuno uništene ili teško oštećene stambene zgrade (teško oštećeni objekti u ruševnom stanju) i oštećene stambene zgrade koje se nalaze na klizištu koje nije moguće ili nije ekonomski opravdano sanirati -----30 bodova

- oštećene stambene zgrade (objekti s jako izraženim oštećenjima)

-----10 bodova

-oštećene stambene zgrade (objekti sa umjereno izraženim oštećenjima)

-----5 bodova

3. broj članova porodičnog domaćinstva

-jednočlano domaćinstvo -----1 bod

-dvočlano domaćinstvo -----3 boda

-tročlano domaćinstvo-----5 bodova

-četveročlano domaćinstvo-----7 bodova

-višečlano domaćinstvo-----10 bodova

4. socijalni status domaćinstva

-korisnici stalne novčane pomoći (po domaćinstvu)-----20 bodova

-četiri i više nezaposlenih punoljetnih članova domaćinstva.....20 bodova

-tri nezaposlena punoljetna člana domaćinstva.....15 bodova

-dva nezaposlena punoljetna člana domaćinstva.....10 bodova

-jedan nezaposlen punoljetni član domaćinstva.....5 bodova

Ako više domaćinstava živi u jednoj stambenoj zgradi, ovaj kriterij se primjenjuje na način da se uzimaju u obzir svi članovi domaćinstava, koji žive ili su živjeli u uništenoj ili oštećenoj stambenoj zgradi na dan proglašenja stanja prirodne nesreće.

5.pripadnost boračkim kategorijama u skladu sa članom 25. Zakona o dopunskim pravima branitelja i članova njihovih porodica (Službene novine Tuzlanskog kantona broj: 05/12, prečišćeni tekst i 05/14):

- dijete šehida, poginulog , umrlog nestalog branitelja bez oba roditelja i ratni vojni invalid sa oštećenjem organizma od 100% I grupe,----- ----10 bodova

-porodično domaćinstvo sa dva i više šehida, poginulih, umrlih, nestalih branitelja i ratni vojni invalid sa oštećenjem organizma od 100% II grupe, -----9 bodova

-dobitnik ratnog priznanja i odlikovanja u okviru kategorije u kojoj se pojavljuje kao podnosilac zahtjeva,-----8 bodova

-porodično domaćinstvo šehida, poginulog, umrlog, nestalog branitelja i ratni vojni invalid sa oštećenjem organizma od 90%, 80% i 70%, -----7 bodova

- član užeg porodičnog domaćinstva poginulog, umrlog i nestalog dobitnika ratnog priznanja ili odlikovanja, -----6 bodova

-ostali ratni vojni invalidi prema procentu invalidnosti (do 60% invaliditeta), -----5 bodova

-demobilisani branici, -----4 boda

-članovi užeg porodičnog domaćinstva umrlog ratnog i mirnodopskog vojnog invalida, umrlog dobitnika ratnog priznanja i odlikovanja, umrlog demobilisanog branitelja, -----3 boda

Pod članom užeg porodičnog domaćinstva iz tačke 5. ovog člana smatraju se roditelji, bračni drug i djeca do navršanih 25 godina života, ako se nalaze na redovnom školovanju, kao i braća i sestre, koji su proglašeni nesposobnim za privređivanje.

6.stručno mišljenje nadležne komisije o prioritetu odabira-----do 10 bodova

Član 5.

Za dodjeljivanje sredstava u skladu sa ovim Pravilnikom raspisuje se javni konkurs u skladu sa raspoloživim sredstvima budžeta općine Živinice.

Član 6.

Odluku o raspisivanju javnog konkursa donosi općinski Načelnik.

Član 7.

Javni konkurs se objavljuje u jednom dnevnom listu, na web stranici općine Živinice i oglasnoj tabli općine Živinice, na oglasnim tablama mjesnih zajednica i u drugim sredstvima javnog informisanja po potrebi, a što će se precizirati odlukom iz predhodnog člana ovog Pravilnika.

Tekst javnog konkursa sadrži:

- 1.predmet javnog konkursa;
- 2.korisnike sredstava, koji imaju pravo na podnošenje prijave;
- 3.uslove iz Pravilnika, koji podnosioci prijave moraju ispunjavati;
- 4.popis dokumenata koje je potrebno priložiti uz prijavu;
- 5.način utvrđivanja visine pojedinačnog iznosa novčane pomoći;

- 6.osnovne kriterije odabira;
- 7.mjesto i rok za dostavu prijave;
- 8.rok za donošenje odluke o odabiru, koji ne može biti duži od 30 dana od dana zatvaranja javnog konkursa.

Član 8.

Dokumentacija, koja se prilaže kao dokaz o ispunjavanju uvjeta iz člana 3. ovog Pravilnika je sljedeća:

- 1.dokaz o državljanstvu podnosioca zahtjeva (uvjerenje o državljanstvu);
- 2.dokaz o vlasništvu (pravnom ili faktičkom) na uništenoj ili oštećenoj stambenoj zgradi na području općine Živinice na dan proglašenja stanja prirodne nesreće (zemljišno-knjižni izvadak, izvod iz posjedovnog lista ili račun za isporučenu električnu energiju za maj 2014. godine);
- 3.kopija zapisnika općinske komisije za procjenu šteta o pričinjenoj šteti na stambenoj zgradi podnositelja zahtjeva;
- 4.ovjerenu izjavu pod krivičnom i materijalnom odgovornošću da su podnosilac zahtjeva i punoljetni članovi porodičnog domaćinstva imali mjesto prebivališta u uništenoj ili oštećenoj stambenoj zgradi na dan 14.05.2014. godine ;
- 5.dokaz da nije vlasnik druge nekretnine namijenjene za stanovanje na području općine Živinice na dan proglašenja stanja prirodne nesreće (potvrda Službe za geodetske i imovinsko-pravne poslove).

Dokaze iz tački 1., 2., 3. i 5. predhodnog stava ovog člana, prvostepena komisija iz člana 9. ovog pravilnika će pribaviti po službenoj dužnosti, osim za dokaze iz tačke 2. koji se odnose na zemljišno-knjižni izvadak koji se pribavlja u Zemljišno-knjižnom uredu Općinskog suda u Živinicama i na račun za isporučenu električnu energiju za maj 2014. godine koje podnosioci sami pribavljaju i dostavljaju u svojoj prijavi na konkurs.

U slučaju sumnje o ispunjavanju uvjeta iz tačke 4. predhodnog stava ovog člana Pravilnika, prvostepena komisija iz člana 9. će od nadležnog organa uprave za vođenje evidencije o prebivalištu, provjeriti izjavu iz tačke 4. predhodnog stava ovog člana ili provjeru izvršiti na drugi pogodan način.

Dokumentacija, koja se prilaže kao dokaz o ispunjavanju uvjeta iz člana 4. ovog Pravilnika je sljedeća:

1. naknadna urbanistička saglasnost u postupku legalizacije izgrađenih objekata, građevinska i/ili upotrebna dozvola za objekte, koji posjeduju navedenu dokumentaciju (fotokopija);
- 2.potvrda općinske službe civilne zaštite o uništenoj stambenoj zgradi ili o stepenu oštećenja stambene zgrade u stanju prirodne nesreće;
- 3.kućna lista ovjerena kod nadležnog općinskog organa za poslove matičnih knjiga ili notara;
- 4.uvjerenje o statusu nezaposlenosti za sve punoljetne članove domaćinstva, izdate od strane biroa za zapošljavanje;
- 5.potvrda JU Centar za socijalni rad Živinice (ako je korisnik stalne socijalne pomoći) ;
- 6.uvjerenje nadležne općinske službe za boračko-invalidsku zaštitu ili Odjeljenja odbrane općine Živinice;
- 7.mišljenje nadležne općinske komisije za procjenu šteta

Dokaze iz tački 2., 6. i 7. predhodnog stava ovog člana, prvostepena komisija iz člana 9. ovog pravilnika će pribaviti po službenoj dužnosti, osim za dokaze koji se na odnose evidencije Odjeljenja odbrane općine Živinice koje će podnosioci zahtjeva, zajedno sa ostalim dokumentima koji se ne pribavljaju po službenoj dužnosti, takođe sami pribaviti i dostaviti.

Član 9.

Provođenje javnog konkursa, obaviće petočlana komisija sastavljena od članova različitih struka, od kojih je najmanje po jedan dipl.ing.geologije, dipl.ing.građevine i jedan član iz Službe civilne zaštite.

Na osnovu prijave, komisija po potrebi izlazi na teren, provjerava navode podnositelja zahtjeva, po potrebi saslušava predsjednika savjeta mjesne zajednice o činjenicama vezanim za zahtjev korisnika i po službenoj dužnosti pribavlja dokumentaciju od nadležnih organa.

Po okončanju provjere i kompletiranju dokumentacije iz predhodnog stava ovog člana, komisija ocjenjuje i boduje prijave o čemu sačinjava zapisnik i rang listu korisnika sa pojedinačnim iznosom novčane pomoći.

Pojedinačni iznos novčane pomoći, koja će se dodijeliti korisniku određuje se na način da se ukupan iznos sredstava namijenjenih u budžetu općine Živinice za novčanu pomoć za uništene i oštećene stambene zgrade dijeli sa ukupnim brojem bodova svih korisnika koji ispunjavaju uvjete javnog konkursa, čime se dobiva vrijednost jednog boda. Tako dobivena vrijednost jednog boda množi sa brojem bodova, koji je ostvario svaki učesnik konkursa koji ispunjava uvjete.

Član 10.

Rang listu iz člana 9. stav 3. ovog pravilnika, komisija objavljuje na oglasnoj tabli općine Živinice, oglasnim tablama mjesnih zajednica, web stranici općine Živinice i dostavlja svim učesnicima javnog konkursa.

Član 11.

Protiv rang liste iz člana 10. ovog pravilnika svaki učesnik javnog konkursa može podnijeti prigovor Drugostepenoj komisiji za rješavanje po prigovoru u roku od 3 (tri) dana od prijema rang liste iz člana 9. ovog Pravilnika.

Prigovorom se može tražiti preispitivanje provedene procedure u smislu eventualnih propusta u ocjeni prijave korisnika od strane komisije iz člana 9. ovog pravilnika.

Drugostepenu komisiju iz stava 1. ovog člana u sastavu predsjednik i dva člana imenuje Općinski načelnik.

Član 12.

Drugostepena komisija iz predhodnog člana ovog pravilnika razmatra prigovore, te utvrđuje njihovu osnovanost.

Ukoliko Drugostepena komisija, utvrdi da su prigovori osnovani, izmijenit će rang listu, a ako utvrdi da prigovori nisu osnovani, odbit će prigovor kao neosnovan.

O svojoj odluci po prigovoru, Drugostepena komisija obavještava podnosiocima zahtjeva i općinskom Načelniku dostavlja konačnu rang listu sa nacrtom odluke o odabiru korisnika i iznosu dodijeljenih sredstava u roku od 7 (sedam) dana od dana isteka roka za prigovor.

Član 13.

Općinski načelnik razmatra nacrt i usvaja odluku o odabiru korisnika sa iznosom dodijeljenih sredstava.

Odluka općinskog Načelnika je konačna i protiv nje se ne može izjaviti žalba.

Član 14.

Sa korisnicima, koji su ostvarili pravo na dodjelu novčanih sredstava za uništene ili oštećene stambene zgrade po osnovu odluke iz člana 13. ovog pravilnika, općinski Načelnik ili od njega ovlaštena osoba će potpisati ugovor o načinu utroška i pravdanja utroška dodijeljenih sredstava.

Dobivena sredstva korisnik je dužan iskoristi za namjenu plaćanja troškove sanacije objekta, što će se precizirati ugovorom iz predhodnog stava ovog člana.

Član 15.

Isplatu odobrenih novčanih sredstava vršit će Služba za budžet i finansije općine Živinice, na osnovu ugovora iz predhodnog člana ovog pravilnika na račune korisnika pomoći.

Član 16.

Kontrolu namjenskog utroška dodijeljenih sredstava iz predhodnog člana ovog pravilnika, vršiće Služba civilne zaštite, koja u tu svrhu može formirati posebnu stručnu komisiju iz reda zaposlenika općine Živinice.

Član 17.

Članovi komisija iz člana 9, 12. i 16. ovog pravilnika ne ostvaruju pravo na naknadu za rad u Komisiji.

Član 18.

Za dodjelu pomoći u građevinskom materijalu, primjenjivaće se iste procedure predviđene kao i za dodjelu novčanih sredstava za pomoć nastradalima na području općine Živinice za uništene i oštećene stambene zgrade.

Član 19.

Na pitanja postupka, koja nisu uređena ovim Pravilnikom primjenjivat će se odgovarajuće odredbe Zakona o upravnom postupku.

Član 20.

Ovaj Pravilnik stupa na snagu danom objavljivanja u „Službenom glasniku općine Živinice“.

Načelnik općine

mr.sci Hasan Muratović,s.r.

**„Službeni glasnik Općine Živinice“
broj: 12/2014**

SADRŽAJ

I – AKTI OPĆINSKOG NAČELNIKA

1. Pravilnik o bližim kriterijumima, postupku i dokumentaciji neophodnoj za ostvarivanje prava za dodjelu novčanih sredstava i građevinskog materijala na ime pomoći vlasnicima uništenih ili oštećenih stambenih zgrada na području općine Živinice.....1

«Službeni glasnik Općine Živinice» uređuje: Stručna Služba općinskog vijeća Živinice
Odgovorni urednik i lektori: Suad Avdagić, Nermina Mahmutbegović i Mersiha Zahirović
Tehnička priprema i štampa: Služba za opću upravu i društvene djelatnosti
Kontakt informacije: 035/743-394, ovijece@opcinazivinice.org
